

Mester skirbi di Dje: Rufo Wever ta cumpli 20 aña morto awe

Mi ta corda bon cla con 20 aña pasa, dia 30 di december 1977, como presentador di "Festival di Dande" na Tereno di Feria na Santa Cruz, mi a haya e informacion cu nos gran musico, compositor y areglista Rufo Wever a caba di fayece.

Mi a pidi e grupo riba escenario pa sigui toca, yama organizador Harry Croes un banda, y nos a trata di wanta e informacion pa dicidi kico lo haci.

Decision final tabata "sigui cu e dande", y esaki pa motibo cu Rufo Wever lo a kier esaki, nos folklore y nos musica tabata "su bida".

Ora cu a anuncia morto di Rufo Wever, e publico a lanta para y aplaudi minuutnan largo pa "un gran Arubiano", kende su composicion (*hunto cu Padu del Caribe*) "Aruba dushi tera" e aña anterior a bira "Himno Nacional", un aña despues cu Rufo Wever a wordo condecora (1975) como Ridder in de orde van Oranje Nassau. Dos siman pasa, mi a publica con bunita Doodle Sophia a toca e wals "Anette" riba su cuarta den Cas di Cultura. E wals cu el a compone y dedica na su mama **Sra. Leonila Maria Annette Lampe**, esposa di **Sr. Civilius Marciel Wever**, mayornan orguyoso di e baby **Rufo Inocencio Wever** cu a nace dia 8 di december 1917.

LAGA NOS REPASA SU BIDA DEN UN RESUMEN

Aki lo bay duna un resumen cortico di e biografia di e musico extraordinario aki, e musico y compositor "cu braza artistico".

Cu 6 aña di edad, rufo a ricibi su "sonfonia di boca" como regalo di su tata y a sorprende tur hende algun dia despues tocando e cancion latino "Amor de Cinco Años" cu tabata popular e tempo ey.

Su tata cu a mira e talento den dje a compra un piano pe u den corto tempo Rufo tabata tocando cancionnan simpel. Su carera musical cu lo a domina resto di su bida a cumenza.

Cu 10 aña di edad, hunto cu su rumannan Libia Martina y Maria Eusebia y



Lucio Rafael el a sufrí perdida di su tata.

Dos aña Rufo a keda inactivo den musica debí na e perdida grandi aki.

El a cuminsa toca atrobe na fiestanan y tabata interpreta cancionnan popular americano di e tempo ey manera "Sweet Jennily", "Yes Sir (she's my baby now)", "Sonny Boy", "Springtime in the Rockies" etc.

Na mes momento e tabata inclui den su repertorio tambe cancionnan popular latino y "nos tumba".

Un aña despues cu 13 aña di edad, Rufo Wever a toca pa prome biaha pafó di Aruba.

Cu e bapor "Maracaibo" el a viaja pa Corsow y bira un sensacion grandi ey nan y un aña despues riba e bapor "El Libertador" el a viaja pa Bonaire hunto cu e equipo di futbol Vitesse, y a cautiva publico bonairiano.

Cu 15 aña di edad, Rufo Wever a forma su banda musical "Melody Band" cu a bira éxito mes ora den cineman, y clubnan, no na Aruba so, pero na Corsow tambe.

Na aña 1935, el a topa cu e musico y showman cubano, **Carlos Pous** cu tabata di bishita na Aruba y ora cu un di e tocadornan

di violin a bira malo di e grupo di Pous, Rufo a ser pidi pa sustitui e tocador.

Rufo a bay di acuerdo bao di condicion cu e mes lo haci tur areglo pa adapta e musica skirbi originalmente pa e violonista di Pous, pa asina e por a toca tur esaki riba Saxophone. Si..., Rufo no tabata toca piano so. E tabata toca tambe saxophone, clarinet, guitarra y cuarta.

E mes aña 1935, e mundialmente famoso cantante Argentino di tango, "Carlos Gardel" a bishita Aruba y Rufo a toca den su shownan.

Bao di inspiracion di Gardel, Rufo a forma despues su propio grupo di tango "Los Trovadores Musicales".

Esaki a bira e prome grupo di Aruba cu a presenta dilanti microfónan di Radio Curom na Corsow (Awe Z-86). Tabata e aña aki tambe cu Rufo a compone su cancion cu a resulta di ta e wals **Arubanita** cu ta ser considera como e di dos himno awe.

Algun aña despues Su Mahestad **Reina Juliana** a balia riba tononan di e wals aki y pa rufo esaki tabata un honor hopi grandi.

COMPOSICIONAN PA SU ISLA

Rufo Wever a compone mas di 400 cancion y cu ritmonan tanto Antiyano, latino y americano. Su nivel di composicion tabata di melodiosan popular te cu nivel di hendenan cu gusto fin di musica pa clase halto.

E pianista, musico popular riba nos isla, **Victor Camacho** a trece riba mercado algun aña pasa un CD cu composicionnan di Rufo y riba su CD recien tambe.

Tin un repertorio grandi ainda di Rufo Wever pa wordo poni riba CD pero ta un instancia mester yuda cu esaki, principalmente e financiamiento, pa por conserva e tesoro musical.

Varios wals di Rufo a worde bautiza cu nombernan manera "Arubanita", "Mi Aruba stima", "Aruba", "Souvenir di Aruba" y den nan tin tambe inserta caracteristicianan distintivo di identidad arubano; respet popio, alegria, seriedad y cortesía.

El a haci donacion na autoridadnan regional di mas o menos 80 composicion di dje y di su coleganan musico.

El a publica cu ayudo financiero di Sticusa, su prome album cu 15 com-

posicion.

CAHA DI ORGEL Y SU DESGRACIA

Durante añanan final di siglo 19, Cah'i Orgel a bira conoci riba e islanan cu a bira Antiyas Hulandes mas o menos 60 aña despues, na 1954.

Aruba conoce awe mas o menos 100 aña di musica di cah'i orgel, pero Rufo Wever, ta e persona cu ta e prome cu a cuminsa traha cah'i orgel na Aruba, cuminsando cu esaki na 1938.

Tabata na 1941 dia 15 di december cu bida di Rufo a cambia drasticamente.

Durante un blackout e anochi di e fecha aki, Rufo y algun amigo cu tabata hunto den un auto, a dal contra un truck di mariniernan.

Den e desgracia aki Rufo a perde su man robey y a keda hospitaliza seis luna, haya riba dje e malesa diabetes, cu a lague practicamente ciego den ultimo etapa di su bida.

Derota pa e desgracia aki, Rufo a retira atrobe di musica y bida publico.

Sinembargo, motivacion enorme y sosten a bini di parti di familiares y amigonan cercano cu, a mescla cu e talento natural di e musico y su espirito di

Sigui lesa pag. 45

Continuacion pagina 44



lucha.

Esaki a haci posible cu despues di algun año, e musico severamente handicap a realiza su "di dos comeback".

Cu yudanza di un braza artificial importa y despues cu un braza artificial cu e mes a fabrica, Rufo a cumenza practica Piano atrobe adaptando su estilo di toca na e circunstan-
cianan nobo di bida.

Na 1950 a nace e cancion cu a bira e joya di De Trupialen, "Aruba Dushi Tera" di Rufo y Padu como compositor nan y aregla pa Rufo, cual composicion 26 año despues a bira "Himno di Aruba", un di e dianan cu Rufo Wever a sinti su mes sumamente orguyoso, un año despues di su Condecoracion cu tabata otro fecha di orguyo pa e gran musico Arubano. Na 1954 Rufo a cumenza un periodo continuo di actividad musical, cuminsando cu inauguracion di "Voz di Aruba" na october.

Despues el a viaja bishitando Venezuela, Costa Rica, Puerto Rico y Corsow, tocando su musica y ricibiendo lo honornan grandi pa su talento musical y cu elogionan di mas bunita internacionalmente.

El a graba diferente disco y tabata presenta su mu-

sica na varios emisora y na television no solamente como musico invita den e diferente programanan di television, pero tambe den su propio programa di television na Tele Aruba.

Ultimo añanan di su bida el a retira di bida publico y e tempo ey, casi ciego, el a dedica su tempo cu yudanza di su ruman Maria Eusebia, na skirbimento di musica.

Rufo Inocencio Wever a fayece dia 30 di december 1977 na edad di 60 año.

Autoridadnan regional, y comunidad Arubano den su totalidad a dune un despedida cu tur honor nacional.

E artista extraordinario aki a despedi di su hende ye pais cu ela stima asina tanto, lagando atras un herencia cultural cu ta pertenece na e mihornan di su profesion. El a laga tras evidencia di con voluntad humano y perseverancia por derota cualquier impedimento fisico y golpi di bida.

Rufo Wever a pertene na e categoria di individuonan cu a kere den union y riba e dia aki y den futuro, su musica lo keda cu nos como ehemplo y inspiracion pa exito pa medio di esfuerzo, amor y cooperacion.

Juby